



# Sib Yuav thiab Nuj Nqis Hauv Minnesota

Marriage and Debts in Minnesota

Daim ntawv qhia lus tseeb no yog muaj lus qhia txog kev sib yuav thiab cov nuj nqis. Yog koj koom muaj nuj nqis nrog lwm tus tabsis tsis sib yuav, saib peb daim ntawv qhia [Cov Khub Tsis Sib Yuav, Nuj Nqis, thiab Vajtse](#).

## Kuv tus txij nkawm tiv nyiaj ua ntej wb sib yuav. Kuv puas yuav tau them cov nuj nqis ntawd?


**Tsis tau.** Tsis yog koj lub luag haujlwm them tej nuj nqis koj tus txij nkawm muaj ua ntej neb sib yuav. Qhov no muaj tseeb txawm tias qhov nuj nqis yog ib yam koj siv – xws li koj tus txij nkawm lub tsev nws yog tus tswv koj nyob tamsim no. Tagnrho tej nuj nqis koj tus txij nkawm nqa los thaum neb sib yuav yog nws li nkaus xwb.

Muaj tseeb tib yam li ntawd rau koj thiab. Cov nuj nqis koj muaj ua ntej neb sib yuav yog koj lub luag haujlwm thiab yuam tsis tau kom koj tus txij nkawm them rau lawv.

## Leejtwg lav phij xauj them cov nuj nqis sib koom?

Yog koj thiab koj tus txij nkawm neb qiv nyiaj ua ke, ces neb ob leeg lav phij xauj them nws rov qab. Tsis hais leejtwg siv cov nyiaj lossis tau khaws cov khoom siv qhov nyiaj qiv yuav. Yog neb ob leeg npe nyob hauv qhov nyiaj qiv, ces yog neb ob leeg kev lav phij xauj.

Yog koj thiab koj tus txij nkawm ua ib daim “credit card” ua ke, ces neb ob leeg lav phij xauj them rau **tagnrho** cov khoom siv daim card yuav. Koj lav phij xauj rau daim card muaj ua ke txawm tais koj tsis pom zoo rau lossis tsis paub tias siv daim card yuav qhov khoom.



Tabsis, tus “tso cai siv” txawv. Yog koj muaj daim credit card thiab muab rau lwm tus yog tus “tso cai siv,” ces koj lav phij xauj rau qhov nuj nqis, tsis yog tus “tso cai siv.”

Yog koj sib nrauj, neb ob leeg yeej tseem lav phij xauj rau qhov nyiaj qiv txawm yog tias tsuas yog ib leeg khaws cov khoom xwb.

Tsuas koj lub npe nyob ntawm qhov nuj nqis ces koj yeej tau lav phij xauj. Yog koj muaj nuj nqis sib koom nrog lwm tus thiab nws tsis them, koj yuav tsum them tas zog tagnrho kom tiv thaiv

koj qhov keebkwm tiv nqi. Koj mam sim muab qhov nyiaj no rov qab los ntawm koj tus txij nkawm qub yog tias koj daim ntawv sib nrauj kawg los ntawm tsev hais plaub hais tias koj tus txij nkawm qub muaj ib txoj kev lav phij xauj rau qhov nuj nqis. Khaws ntawv povthawj tias koj them tagnrho cov nqi lawm.

Yog tsis muaj dabtsi txog qhov nuj nqis hauv daim ntawv sib nrauj ces koj mam sim seb puas tau ib qho nyiaj rov qab hauv tsev hais plaub pej xeem sib foob nyiaj txiag, tabsis tej zaum yuav ua nyuaj. Saib peb daim ntawv qhia, [Chav Hais Plaub Pej Xeem Sib Foob](#).

## **Cov nuj nqis dabtsi ua ib tug txij nkawm npe xwb tabsis ob leeg tau lav phij xauj rau?**

Muaj tej co nuj nqis tshwm sim thaum koj sib yuav uas neb ob leeg tau lav phij xauj tau – txawm yog tias nws ua koj tus txij nkawm lub npe xwb thiab txawm tias koj tsis paub txog lawv li.

- **Khoom rau Tsev Neeg thiab Vajtse**

Neb ob leeg lav phij xauj rau tej nuj nqis rau tej khoom yuav tsum muaj rau lub tsev uas siv los ntawm tsev neeg. Piv txwv, yog koj tus txij nkawm yuav lub qhov cub uas koj tsev neeg siv, neb ob leeg lav phij xauj them qhov nqis ntawd.



- **Nqi Kho Mob**

Yog koj tus txij nkawm muaj nuj nqis kho mob ua lawv npe, feem ntau koj tsis yog tus yuav tau them yog hais tias koj tsis tau pom zoo kam them. Tiamsis yog neb sib nrauj, tus kws txiav txim plaub muaj feem txiav txim kom koj them tagnrho lossis ib feem ntawm cov nuj nqi ntawd. Tsis tas li ntawd, yog koj tus txij nkawm tag sim neej ua ntej them cov nuj nqi kho mob tag, qhov chaw nws tiv nqi muaj feem tuaj tsib nyiaj ntawm koj tus txij nkawm cov vaj tse thiab khoom ntiag tug.

- **Lwm Cov Nqi**

Neb ob leeg lav phij xauj rau lwm cov nuj nqis muaj koj tus txij nkawm npe nkaus xwb yog tias koj xee npe rau daim ntawv cog lus kam them cov nuj nqis. Qee zaus qhov no hu ua sau-npe-nrog (co-signing). Yog koj tsis xav kom lav phij xauj, tsis txhob tso koj lub npe rau qhov nuj nqi.

Qee zaus koj tsis tas them cov nuj nqis uas tsis muaj koj lub npe rau hauv. Piv txwv, yog koj tus txij nkawm qiv nyiaj rau lub maus taus muaj nws npe xwb, ces koj tsis tau lav phij xauj tsuas yog tshe koj xav kom muab lub maus taus ua koj tug.

## **Kuv puas tseem tau lav phij xauj rau cov nqi kho mob thiab nqi siv ua neej thaum wb sib cais lawm?**

Yog neb sib cais lossis tsis nyob ua ke lawm, koj tsis tau lav phij xauj rau koj tus txij nkawm cov nqi kho mob lossis nqi siv rau vajtse uas tshwm sim tom qab neb sib cais.

## **Yuav ua li cas thiaj qhia tau tias wb sib cais lawm?**

Yog muaj, koj muab tau daim ntawv txiav txim sib cais los ntawm tsev hais plaub qhia tau. Dua li ntawd, koj siv tau cov ntawv xauj tsev lossis nqi them fais fab, nkev, dej los qhia tias koj thiab koj tus txij nkawm neb nyias muaj nyias tsev.

## **Ua cas rau wb cov nuj nqis muaj ua ke yog wb sib nrauj?**

Thaum koj sib nrauj, tsev hais plaub ua daim ntawv txiav txim hu ua “divorce decree” daim ntawv sib nrauj. Daim ntawv “sib nrauj” muaj tus kws txiav txim qhov lus txiav txim txog cov nuj nqis. Tus kws txiav txim yuav txiav txim siab seb leejtwg yog lav phij xauj rau cov nuj nqis. Piv txwv, tej zaum koj yuav tau them tagrho lossis ib qho ntawm cov nuj nqis uas muaj koj tus txij nkawm lub npe, lossis tej zaum tus kws txiav txim yuav txiav yuav txim siab tias muab cov nuj nqis faib sib npaug rau neb ob leeg them.

**Tab sis nco ntsoov:** daim ntawv sib nrauj tsuas yog cuam tshuam neb xwb, tsis yog tus neb tiv nyiaj rau. Yog koj lub npe nyob hauv qhov nuj nqis, ces tus koj tiv nqis rau foob tau koj txawm hais tias daim ntawv sib nrauj tias koj tus txij nkawm qub yuav tau them qhov nuj nqis thiab.

Yog koj tau them qhov nuj nqis uas tus txiav txim hais tias yog koj tus txij nkawm kev lav phij xauj, rov qab mus hauv tsev hais plaub thiab hais kom lawv yuam kom ua raws li daim ntawv sib nrauj hais. Muab daim ntawv sib nrauj rau tsev hais plaub saib thiab muab povthawj tias koj tau them qhov nuj nqis lawm. Cov ntawv them nqi lossis tshev sau yog povthawj zoo.

## **Yog tias kuv tus txij nkawm tsub ib cov nuj nqis ua kuv npe thiab kuv twb tsis paub txog ne?**

Minnesota txoj kevcai yuam nuj nqis pab tau koj yog hais tias koj tus txij nkawm tsub nqi ua koj lub npe (xws li credit card) es koj tsis paub txog nws li. LOSSIS koj tus txij nkawm yuam koj lossis hauv koj mus txais qhov nuj nqis. Qhov no hu uas “economic abuse” ua phem txog nyiaj txiag. Tamsis no nws muaj ib txoj kev los thov kom tus kws txiav txim tsis txhob hais kom koj them. Koj yuav tsum yog ib tug neeg raug ntau hauv vaj tsev, thab zes, lossis siv deev lossis raug yuam ua niam ntiav thiaj li thov tau qhov kev zam no.

Koj yuav tsum sau ntawv mus qhia tus neeg koj tiv nqi paub thiab muab cov ntaub ntawv piav qhov teebmeem rau lawv thiab qhia hais tias vim li cas nws tsis yog koj luag haujlwm them. Tej zaum yog tej yam xws li:

- daim ntawv tub ceev xwm sau
- daim ntawv tias dag cuav/nyiag koj ntaub ntawv
- daim ntawv sib nrauj, lossis
- daim ntawv koj sau lav muaj tseeb mus rau tus neeg koj tiv nqi

Koj thov tau kom tus kws txiav txim plaub zam koj ntawm cov nuj nqis lossis yuam kom koj tus txij nkawm uas tus them cov nuj nqi ntawd. Koj kuj thov tau kom tus kws txiav txim plaub ua rooj plaub kom tsis pub leeg twg paub yog koj toobkas kom muaj kev ruaj ntseg tsis txhob raug ua phem rau yav tom ntej lawm.

Txoj cai no tsis suav cov nuj nqis uas muab nyiaj/khoom cas. Cov nuj nqis no yog cov nuj nqis nrog “nyiaj/khoom cas.” Pivtxwv, lub tsheb koj tau rov qab lossis muab lub tsev kaw yog hais tias tsis them nqi tsev. Nws kuj tsuas yog hais txog cov nuj nqis tshiab uas tshwm sim tom qab lub Ib Hli Ntuj hnuv tim 1, 2024. Koj siv tsis tau nws rau cov nuj nqis qub.

### **Sib Rauj thiab Vajtse**

Tus kws txiav txim kuj txiav txim siab tias yuav ua li cas rau “vajtse” uas koj thiab koj tus txij nkawm yuav thaum tseem sib yuav. Vajtse yog av thiab cov tsev loj, xws li lub tsev. Neb ob leeg muaj cai kom tau tsawg kawg los ib qho ntawm cov vajtse yuav thaum neb tseem sib yuav, **txawm yog tias nws muaj ib tug lub npe xwb.** Yog koj xav yuav lub tsev tej zaum tus kws txiav txim yuav kom koj lav phij xauj rau them nqi tsev, se, thiab kho lub tsev.



Ua ntej koj xee cov ntawv sib nrauj, ua zoo kom koj totaub tias tiv nyiaj pestsawg rau ib lub vajtse uas tsuas muaj koj tus txij nkawm lub npe xwb. Koj thiab koj tus txij nkawm mam li pom zoo seb tus tug tau tagnrho cov cai rau lub tsev thaum sib nrauj. Yog koj tsis pom zoo, tus txiav txim mam li txiav txim thaum kawg.

Yog koj tsis xa kom lav phij xauj rau qhov nyiaj tiv rau lub tsev, tej zaum koj tsis xav yuav koj npaug ntawm lub tsev. Qhia rau tus kws txiav txim. Koj thiab koj tus txij nkawm mam li pom zoo tias cia nws tau cai tagnrho rau lub tsev thaum sib nrauj. Yog koj tsis pom zoo, tus txiav txim mam txiav txim thaum kawg.

### **Yog tus neeg sau nuj nqis hais tias kuv yuav tau them kuv tus txij nkawm qhov nuj nqis ne?**

Yog ib qho chaw qiv nyiaj tiv tauj koj hais tias koj yuav tau them qhov nqi uas ua koj tus txij nkawm npe, nug seb qhov nqi ntawd yog dabtsi. Yog nws tsis yog ib qho nuj nqis hauv vajtse ntawm lub neej sib yuav lossis ib qho nqi kho mob uas koj zoo siab them, tejzaum koj yuav tsis tau them. Txoj kev zoo tshaj los tiv thaiv koj tus kheej ntawm tej no yog nco ntsoov muab tagnrho cov nuj nqis sau rau hauv daim ntawv sib nrauj. Ua zoo xyuas kom daim ntawv sib nrauj sau tagnrho lawv nyob hauv thiab hais tias leejtwg lav phij xauj rau lawv.

**Ceev Faj:** Yog koj them rau ib tug nqi uas tsis yog koj li thaum lub sijhawm ntawd, tej zaum koj yuav tau lav phij xauj rau tagnrho qhov nuj nqis ntawd mus lawm yav tom ntej.

Txawv lub xeev nyias muaj nyias kevcai. Tej zaum tus neeg kev nuj nqis nyob lwm lub xeev tsis paub Minnesota kevcai. Hais tus neeg sau nuj nqis rau lossis tus kev nuj nqis kom xa povthawj qhia tias koj yog tus lav phij xauj rau qhov nuj nqis. Povthawj yog ib daim ntawv nqi qhia qhov nuj nqi rau ib yam khoom tseem ceeb rau hauv vajtse. Povthawj kuj yog tau daim ntawv xee npe los ntawm koj tias koj kam them qhov nuj nqis.

Yog koj raug foob, nco ntsoov “Teb” tsev hais plaub cov ntaub ntawv. Saib peb daim ntawv qhia [Yuav Ua Li Cas Yog Koj Raug Foob](#).

Tsis quav ntseg cov ntaub ntawd yuav ua rau tsev hais plaub txiav txim tias koj yuav tsum them qhov nuj nqis. Qhia tsev hais plaub txog Minnesota txoj kevcai. Piav qhia hais tias koj tus txij nkawm qhov nuj nqi tsis yog cov nuj nqi rau lub vajtse lossis hais tias koj tsis nrog koj tus txij nkawm nyob thaum nws qiv/txais cov nqi no.

Koj muaj feem ntawm [www.lawhelpmn.org/forms](http://www.lawhelpmn.org/forms) (Ius Askiv xwb)

→ Nrhiav “Debts, Fees, Deposits”

→ Nias rau “Answer a “Summons and Complaint - Debt Collector Lawsuits”

### **Yog tias cov nuj nqis tshwm sim ua ntej kuv tsiv los rau hauv Minnesota ne?**

Yog koj nyob lwm lub xeev yav tas los lawm, Minnesota txoj cai tsis txiav txim tias leejtwg yog tus lav phij xauj rau cov nuj nqis tshwm sim nyob lwm qhov chaw. Saib cov kevcai ntawm lub xeev koj tsiv los seb koj puav tau lav phij xauj rau ib qho ntawm koj tus txij nkawm cov nuj nqis uas tshwm sim thaum koj nyob lwm qhov chaw. Yuam tau kom koj them qhov nuj nqis hauv Minnesota yog tias ib lub tsev hais plaub nyob rau lwm lub xeev txiav txim tias neb ob leeg tiv rau qhov tawm-xeev nuj nqis.



Khaws tej ntaub ntawv nyiaj txiag kom txhij txhua. Nco tsoom sau cov yog koj li thiab qhov koj tiv thiab tsis tiv cia. Khaws cov uas koj ntiag tug thiab cov koj tiv. Khaws ntawv zoo cia yuav pab kom koj tswj tau koj cov nuj nqis, thiab tej zaum kuj pab koj qhia cov neeg tiv nuj nqis rau tias cov nuj nqis twg koj tsis lav phij xauj rau.

*Cov ntawv Qhia Tseeb yog qhia kom paub txoj kevcai xwb TSIS yog muab txwv yim txog txoj kevcai. Mus ntsib ib tug kws lij choj rau tswv yim. Tsis txhob siv daim ntawv qhia tseeb yog tias nws qub tshaj ib xyoos lawm. Nug peb txog cov hloov tshiab, daim ntawv qhia txog cov ntawv qhia tseeb, lossis lwm hom ntawv.*

© 2026 Minnesota Legal Services Coalition. Luam tau daim ntawv no los siv rau tus kheej tsis ua lag luam thiab qhia kom paub xwb. Tagnrho lwm cov cai ceev tseg. Qhov lus sau no yuav tsum nyob rau txhua daim ntawv. Txwv tsis pub muab luam, faib, thiab siv ua lag luam.